

INUIT ATAQATIGIIT



UKA2019/Imm. 33 & 53

15. oktober 2019

Peter Olsen

Meeqqanut suli atualingitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaanni §9 imm. 1 allangorteqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut. Taamaalilluni meeqqat illugiimmik angajoqqaallit, tamarmik sulisimappata imaluunniit ilinniartuuppata, kommuneq ulluunerani paaqqinniffiitut ulluuneranilu paarsisarfinnut utaqqisut allattorsimaffianni meeqqanut kisimiittunik angajoqqaalinnut sulisimappata imaluunniit ilinniartuuppata assigiimmik pineqarnissaat angujumallugu.

(Inatsisartunut Ilaasortaq Laura Tàunâjik, Siumut)

aamma

Meeqqanut suli atualingitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaat allangorteqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut. Inatsisip allangortinneratigut qulakkeerneqassaag, kalaallit nunani allani ilinniartut qitornaasa1 kommunip meeqqueriviutaanut ulluuneraniluunniit angerlarsimaffinni paaqqinnittarfinnut utaqqisunut allanut naleqqiullugu sallinngortinneqartalernissaat ilinniartup Kalaallit Nunaanni sullivimmi imaluunniit oqartussaaffiit arlaanni sulilernissaminut isumaqatigiissuteqarluni takutissinnaappagu.

(Inatsisartunut Ilaasortaq Malene Vahl Rasmussen, Demokraatit)

Inatsisartunut ilaasortap Laura Táunâjik-ip aammalu Malene V. Rasmussenip aaliangiiffigisassatut siunnersuutaanut, qulani pineqartunut qujalluta, matumuuna Inuit Ataqatigiinniit imaattumik oqaaseqaateqassaagut.

Siullermik piffissaq manna iluatsillugu illoqarfinni assigiinngitsuni, meeqquerivinni inissaaleqiffiusuni tamani, kommunalbestyrelsit sukataarneroqqullugit, ilungersorneroqqullugillu qinnuigerusuppagut, illoqarfigisaminnilu meeqquerivinni inissat killeqarsimappata taava meeqquerivinnik sanaartoqqullugit; ilissiuvusimi meeqqueriviit sanaartorneqarnissaannik akisussaasuusut.

Akisussaaffissinnik kivitsiniaritsi; akisussaaffissilu kivissinnaagussiuk taava ajornartorsiut manna pineqartoq piussanngikkaluarami.

Aap taava; Torrutiinavillugu Inuit Ataqatigiinniit oqaatigissavarput, Laura Táunâjik-ip aammalu Malene V. Rasmussenip oqariartuutaat paasilluarlugillu isumaqataaffigatsigit; tassalu nunatsinni

ilinniarsimassutsikkut unammilligassaqaernerput pillugu, nunaqqatittalu akornanni ilinniagaqarnissaq kajuminnarnerulersinneqassappat aammalu ilinniagaqareersimanerup kingorna nunatsinni inooqataallunilu suleqataasinnaanerup kajuminnarnerulernissaa anguneqassappat taava nunatsinni meeqqeriveqarnerup tungaatigut periarfissarititaasut pitsaanerujussuusariaqarmata.

Aap ilumut, tassa taamaattariaqaralarpoq; ilinniartuullunga meeraqaruma, meeqqama ajornannginnerusumik meeqqerivimmud ajornannginnerusumik inissinneqarsinnaasariaqaralarpoq aammalu qallunaat nunaanniit ilinniareersimallunga nunatsinnut uteruma meeraqarlungalu, meeqqama meeqqerivimmud inissaqarsinnaatitaanissaa ajornannginnerusariaqaralarpoq.

Nunatsinni ilinniartortagut tamaasa eqqarsaatigalugit, ilinniarsimasortagullu kikkuugaluartut tamaasa eqqarsaatigalugit, nunatsinni ilinniartuuppata, qallunaat nunaanniluunniit ilinniartuuppata, meeqqeriveqarnerup tungaatigut politikkeqarnerput pitsaanerusariaqartoq Inuit Ataqtigiinniit ataqtigut naqissuserusupparput.

Taamaattoq taamatut sulinitanni aamma eqqaamassavarput kikkut akisussaasuunersut puiussannginnatsigit;

Inatsit 2012-meersoq malillugu meeqqerivinnik akisussaasut aqutsisussallu tassaapput kommunalbestyrelsit. § 7-lu malillugu kommunalbestyrelse tassaavoq kikkut inissinneqarnissaannik innersuussaqaqtusaaq. Inissallu ulikkaaqqasimappata, taava § 9 malillugu kommunalbestyrelse pingaarnersiulluni innersuussaqaqtusaaavoq.

Pingaarnersiunermini nalilersueriaatsit, pissutsillu assigiinngitsut tunngavigalugit pingaarnersiuisoqartarpoq A, B, C, D, E, F,-mullu immikkoortinneqarsimallutik.

Sukumiinerusumik taakku uani iserfigissanngilakka.

Siunertaq anguniagarlu paasinarlunilu tapersernaraluartoq, taamaattoq Inuit Ataqtigiinniit imaaliallaannaq akuerseqataaffiginiannilarput, pissutigalugu kommunit namminiussuseqarnerat pingaartillutigulu ataqqilluinnaqqissaaratsigu, kommunillu qulaatiinnarlugit aaliangiinissarput Inuit Ataqtigiit kissaatiginngeqaarput.

Taamaattoq siullermeernerani ingerlaannaq itigartinngikkaluarlutigu ataatsimiititaliamut ingerlakkusupparput, ataatsimiititaliaq aqutugalugu kommunit qanoq isumaqarnerut tusarniarneqarsinnaanerat paaseqqaalaarusukkatsigu.

Kommunit qulaatiinnarlugit aaliangiiffiginatigit kommunit tusarniaqqaalaartigit; kommunimmita siunnersuutit uku marluk pineqartut pillugit qanoq isumaqarpat?

Tamanna pillugu immikkoortoq una aappasaaninnginnerani isumaginninnermut ataatsimiititaliamut Inuit Ataqtigiinniit ingerlateqqipparput kommunit tusarniarneqarsinnaanerat periarfissikkumallutigut.

Qujanaq
In.in.
Peter Olsen